



RIALACHÁN TARMLIGTHE (AE) 2025/843 ÓN gCOIMISIÚN
an 5 Bealtaine 2025

**lena leasaítear Iarscríbhinn I a ghabhann le Rialachán (AE) 2019/1021 ó Pharlaimint na hEorpa agus
ón gComhairle a mhéid a bhaineann le UV-328**

(Téacs atá ábhartha maidir le LEE)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2019/1021 ó Pharlaimint na hEorpa agus ón gComhairle an 20 Meitheamh 2019 maidir le
truailleáin orgánacha mharthanacha ⁽¹⁾, agus go háirithe Airteagal 15(1) de,

De bharr an mhéid seo a leanas:

- (1) Le Rialachán (AE) 2019/1021, cuirtear chun feidhme gealltanais an Aontais faoi Choinbhinsiún Stócólm 2001 ar Thruailleáin Orgánacha Mharthanacha ⁽²⁾ ('an Coinbhinsiún') agus faoin bPrótacal a ghabhann le Coinbhinsiún 1979 ar Thruailliú Air Trasteorann Fadraoin maidir le Truailleáin Orgánacha Mharthanacha ⁽³⁾ ('an Prótacal').
- (2) Tá liosta ceimiceán in Iarscríbhinn A a ghabhann leis an gCoinbhinsiún. Ceanglaítear ar gach Páirtí sa Choinbhinsiún na ceimiceán ar an liosta a thoirmeasc agus/nó na bearta dlíthiúla agus riaracháin is gá a dhéanamh chun deireadh a chur lena dtáirgeadh, lena n-úsáid, lena n-allmhairiú agus lena n-onnmhairiú.
- (3) Le linn an 11ú cruinniú a bhí ag Comhdháil na bPáirtithe sa Choinbhinsiún ón 1 go dtí an 12 Bealtaine 2023, rinne sí cinneadh, de bhun Airteagal 8(9) den Choinbhinsiún, Iarscríbhinn A a ghabhann leis an gCoinbhinsiún a leasú chun UV-328 a áireamh san Iarscríbhinn sin agus díolúintí sonracha ag baint leis sin. Thacaigh an tAontas le UV-328 a áireamh in Iarscríbhinn A agus díolúintí sonracha ag baint leis sin mar a shonraítear i gCinneadh (AE) 2023/1006 ón gComhairle ⁽⁴⁾.
- (4) Dá bhrí sin, ba cheart Cuid A d'Iarscríbhinn I a ghabhann le Rialachán (AE) 2019/1021, ina bhfuil liosta na substaintí a liostaítear sa Choinbhinsiún agus sa Phrótacal chomh maith le substaintí nach liostaítear ach sa Choinbhinsiún, a leasú chun UV-328 a áireamh.
- (5) Áirítear UV-328 in Iarscríbhinn XIV a ghabhann le Rialachán (AE) Uimh. 1907/2006 ó Pharlaimint na hEorpa agus ón gComhairle ⁽⁵⁾, chomh maith leis an dáta is déanaí chun iarratas a chur isteach an 27 Bealtaine 2022 agus dáta éagtha an 27 Samhain 2023. Níor cuireadh isteach aon iarratas ar údarú. In éagmais údarú faoi Rialachán (AE) Uimh. 1907/2006, ní féidir UV-328 a úsáid san Aontas, ach is féidir é a allmhairiú in earraí fós.
- (6) Bhí glao ar fhaisnéis ag an nGníomhaireacht Eorpach Ceimiceán ón 31 Bealtaine go dtí an 18 Lúnasa 2023. Tacaíonn na barúlacha a cuireadh isteach leis an ngá atá leis na díolúintí sonracha a áirítear i gCinneadh SC-11/11 ó Chomhdháil na bPáirtithe sa Choinbhinsiún, amhail le haghaidh mótarfheithiclí talún, deighilteoirí meicniúla i bhfeadáin bailithe fola, polaraitheoirí, páipéar fótagrafach agus páirteanna spártha.

⁽¹⁾ IO L 169, 25.6.2019, lch. 45, ELI: <http://data.europa.eu/eli/reg/2019/1021/oj>.

⁽²⁾ IO L 209, 31.7.2006, lch. 3, ELI: <http://data.europa.eu/eli/convention/2006/507/oj>.

⁽³⁾ IO L 81, 19.3.2004, lch. 37, ELI: <http://data.europa.eu/eli/prot/2004/259/oj>.

⁽⁴⁾ Cinneadh (AE) 2023/1006 ón gComhairle an 25 Aibreán 2023 maidir leis an seasamh atá le glacadh thar ceann an Aontais Eorpaigh ag an 11ú cruinniú de Chomhdháil na bPáirtithe i gCoinbhinsiún Stócólm ar Thruailleáin Orgánacha Mharthanacha a mhéid a bhaineann leis na tograí chun Iarscríbhinn A a ghabhann leis an gCoinbhinsiún sin a leasú (IO L 136, 24.5.2023, lch. 55, ELI: <http://data.europa.eu/eli/dec/2023/1006/oj>).

⁽⁵⁾ Rialachán (CE) Uimh. 1907/2006 ó Pharlaimint na hEorpa agus ón gComhairle an 18 Nollaig 2006 maidir le Clárú, Meastóireacht, Údarú agus Srianadh Ceimiceán (REACH), lena mbunaítear Gníomhaireacht Eorpach Ceimiceán, lena leasaítear Treoir 1999/45/CE agus lena n-aisghairtear Rialachán (CEE) Uimh. 793/93 ón gComhairle agus Rialachán (CE) Uimh. 1488/94 ón gCoimisiún chomh maith le Treoir 76/769/CEE ón gComhairle agus Treoir 91/155/CEE, Treoir 93/67/CEE, Treoir 93/105/CE agus Treoir 2000/21/CE ón gCoimisiún (IO L 396, 30.12.2006, lch. 1, ELI: <http://data.europa.eu/eli/reg/2006/1907/oj>).

- (7) Chun allmhairiú earraí áirithe ina bhfuil UV-328 a cheadú go dtí go ndéanfar an tsbaint sin a ionadú go hiomlán, ba cheart díolúintí sonracha áirithe a áirítear i gcinneadh SC-11/11 a dheonú san Aontas ar feadh tréimhse 5 bliana a mhéid a bhaineann le UV-328 in earraí áirithe a chur ar an margadh agus le húsáid na n-earraí sin ina bhfuil UV-328. Baineann sé sin leis na hearraí a leanas: deighilteoirí meicniúla i bhfeadáin bailithe fola, i scannán ceallalóis trí-aicéitile i bpolaraitheoirí agus i bpáipéar fótagrafach. Ba cheart díolúintí a dheonú freisin maidir le hearraí i mótarfheithiclí talún. Áirítear ar mhótarfheithiclí talún gluaisteach, gluaisrothair, mótarfheithiclí talmhaíochta agus tógála agus trucaí tionsclaíocha, lena n-áirítear mótarfheithiclí a chumhdaítear le Rialachán (AE) 2018/858 ⁽⁶⁾, Rialachán (AE) Uimh. 167/2013 ⁽⁷⁾ agus Rialachán (AE) Uimh 168/2013 ⁽⁸⁾ ó Pharlaimint na hEorpa agus ón gComhairle.
- (8) Thairis sin, ba cheart díolúintí a dheonú maidir leis na hearraí seo a leanas agus iad brataithe le meascáin ina bhfuil UV-328: mótarfheithiclí talún, meaisíní innealtóireachta, feithiclí iompair ar iarnród, agus struchtúir chruach mhóra ag a bhfuil bratuithe tromshaothair. Ina theannta sin, i gcomhréir le Cinneadh SC-11/11, ba cheart díolúine a dheonú freisin maidir le páirteanna spártha a chur ar an margadh agus a úsáid le haghaidh feidhmeanna áirithe inar úsáideadh UV-328 ina dtáirgeadh ar dtús.
- (9) Le hAirteagal 3 de Rialachán (AE) 2019/1021 toirmiscear monarú, cur ar an margadh agus úsáid na substaintí a liostaítear in Iarscríbhinn I a ghabhann leis an Rialachán sin, bídís leo féin, i meascáin nó in earraí. I ndáil leis sin, maidir le hearraí ina bhfuil UV-328 agus a tháirgtear nó a chuirtear ar an margadh faoi dhíolúine a leagtar síos in Iarscríbhinn I a ghabhann leis an Rialachán sin agus a bhí in úsáid cheana féin ar dháta éaga na díolúine ábhartha, ba cheart a shoiléiriú go gceadaítear leanúint dá n-úsáid tar éis an dáta sin.
- (10) Soláthraíodh faisnéis tríd an sásra aiseolais phoiblí go bhfuil UV-328 in go leor aerárthaí atá le seachadadh chuig aerlínte de chuid an Aontais sna 5 bliana amach romhainn agus i bpáirteanna spártha le haghaidh na n-aerárthaí sin. Chun iarmhairtí tromchúiseacha d'aerlínte de chuid an Aontais a sheachaint, ba cheart díolúine a dheonú lena gceadaítear leanúint de na haerárthaí agus na páirteanna spártha d'aerárthaí sin a sheachadadh.
- (11) Chun cur i bhfeidhm agus forfheidhmiú Airteagal 3(1) de Rialachán (AE) 2019/1021 san Aontas a threisiú, ba cheart teorainnluach a shocrú i ndáil le UV-328 a bhíonn ann mar rian-éilleán neamhbheartaithe i substaintí, i meascáin nó in earraí. Chun go mbeidh saotharlanna in ann feabhas a chur ar chruinneas na modhanna anailíseacha ábhartha agus chun a áirithiú go gcuirfead i bhfeidhm go haonfhoirmeach agus go leordhóthanach iad, ba cheart an teorainn rian-éilleán neamhbheartaithe a shocrú ag 100 mg/kg tráth theacht i bhfeidhm an Rialacháin seo, ag 10 mg/kg 2 bhliain tar éis an teacht i bhfeidhm agus ag 1 mg/kg 4 bliana tar éis an teacht i bhfeidhm.
- (12) Ba cheart, dá bhrí sin, Rialachán (AE) 2019/1021 a leasú dá réir,

⁽⁶⁾ Rialachán (AE) 2018/858 ó Pharlaimint na hEorpa agus ón gComhairle an 30 Bealtaine 2018 maidir le ceadú mótarfheithiclí agus a leantóirí, agus córas, comhpháirteanna agus aonad teicniúil ar leithligh atá ceaptha le haghaidh feithiclí den sórt sin, agus faireachas margaidh orthu, lena leasaítear Rialachán (CE) Uimh. 715/2007 agus (CE) Uimh. 595/2009 agus lena n-aisghairtear Treoir 2007/46/CE (IO L 151, 14.6.2018, lch. 1, ELI: <http://data.europa.eu/eli/reg/2018/858/oj>).

⁽⁷⁾ Rialachán (AE) Uimh. 167/2013 ó Pharlaimint na hEorpa agus ón gComhairle an 5 Feabhra 2013 maidir le formheas agus le faireachas margaidh ar fheithiclí talmhaíochta agus foraoiseachta (IO L 60, 2.3.2013, lch. 1, ELI: <http://data.europa.eu/eli/reg/2013/167/oj>).

⁽⁸⁾ Rialachán (AE) Uimh. 168/2013 ó Pharlaimint na hEorpa agus ón gComhairle an 15 Eanáir 2013 maidir le ceadú agus le faireachas margaidh ar fheithiclí dhá nó trí roth agus cuadrothair (IO L 60, 2.3.2013, lch. 52, ELI: <http://data.europa.eu/eli/reg/2013/168/oj>).

TAR ÉIS AN RIALACHÁN SEO A GHLACADH:

Airteagal 1

Leasaítear Iarscríbhinn I a ghabhann le Rialachán (AE) 2019/1021 i gcomhréir leis an Iarscríbhinn a ghabhann leis an Rialachán seo.

Airteagal 2

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, an 5 Bealtaine 2025.

Thar ceann an Choimisiúin
An tUachtarán
Ursula VON DER LEYEN

IARSCRÍBHINN

I gCuid A d'Iarscríbhinn I a ghabhann le Rialachán (AE) 2019/1021, cuirtear isteach an iontráil seo a leanas:

Substaint	Uimh. CAS	Uimh. CE	Díolúine shonrach maidir le húsáid idirmheánach nó sonraíocht eile
'2-(2 <i>H</i> -beansaithrí-asól-2-il)-4,6-dé- <i>treas</i> -peintilfeanól (UV-328)	25973-55-1	247-384-8	- Chun críocha na hiontrála seo, beidh feidhm ag Airteagal 4(1), pointe (b), maidir le tiúchaintí UV-328 atá cothrom leis na méideanna seo a leanas nó faoina mbun: 100 mg/kg (0,01 % de réir meáchain) ón 4 Lúnasa 2025, 10 mg/kg (0,001 % de réir meáchain) ón 4 Lúnasa 2027, 1 mg/kg (0,0001 % de réir meáchain) ón 4 Lúnasa 2029, i gcás ina bhfuil siad i substaintí, i meascáin nó in earraí. - De mhaolú air sin, ceadófar UV-328 atá in earraí a chur ar an margadh agus úsáid na n-earraí sin chun na gcríoch seo a leanas: - i mótarfheithiclí talún, go dtí an 4 Lúnasa 2030, - i mbratú tionsclaíoch le haghaidh mótarfheithiclí talún, meaisíní innealtóireachta, feithiclí iompair ar iarnród, agus bratuithe tromshaothair le haghaidh struchtúir chruach mhóra, go dtí an 4 Lúnasa 2030, - i ndeighilteoirí meicniúla i bhfeadáin bailithe fola, go dtí an 4 Lúnasa 2030, - i scannán ceallalóis trí-aicéitile, go dtí an 4 Lúnasa 2030, - i bpáipéar fótagrafach, go dtí an 4 Lúnasa 2030, - in aerárthaí sibhialta agus míleata, go dtí an 4 Lúnasa 2030, - i bpáirteanna spártha le haghaidh aon cheann de na nithe seo a leanas: - mótarfheithiclí talún; - meaisíní tionsclaíocha seasta le húsáid sa talmhaíocht, san fhoraoiseacht, agus san earnáil tógála; - taispeáintí leachtchriostail in uirlisí le haghaidh anailíse, tomhas, rialaithe, faireacháin, tástála, táirgeachta agus cigireachta, cé is moite d'uirlisí le haghaidh feidhmeanna leighis; i gcás inar úsáideadh UV-328 ina dtáirgeadh ar dtús, go dtí deireadh a ré feidhme nó go dtí an 31 Nollaig 2043, cibé acu is túisce; - i bpáirteanna spártha le haghaidh aon cheann de na nithe seo a leanas: - taispeáintí leachtchriostail i ngairis a thagann faoi raon feidhme Rialachán (AE) 2017/745, agus faoi raon feidhme Rialachán (AE) 2017/746 (*); - taispeáintí leachtchriostail in uirlisí le haghaidh anailíse, tomhas, rialaithe, tástála, táirgeachta agus cigireachta;

Substaint	Uimh. CAS	Uimh. CE	Díolúine shonrach maidir le húsáid idirmheánach nó sonraíocht eile
			i gcás inar úsáideadh UV-328 ina dtáirgeadh ar dtús, go dtí deireadh a ré feidhme; (i) i bpáirteanna spártha le haghaidh aerárthaí sibhialta agus míleata inar úsáideadh UV-328 ina dtáirgeadh ar dtús, go dtí an 31 Nollaig 2030. 3. Earraí ina bhfuil UV-328 agus atá in úsáid cheana féin san Aontas roimh dháta éaga na díolúine ábhartha a leagtar síos i bpointe 2(a) go (i), nó ar an dáta sin, féadfar leanúint dá n-úsáid.

(*) Rialachán (AE) 2017/746 ó Pharlaimint na hEorpa agus ón gComhairle an 5 Aibreán 2017 maidir le feistí leighis diagnóiseacha in vitro agus lena n-aisghairtear Treoir 98/79/CE agus Cinneadh 2010/227/AE ón gCoimisiún (IO L 117, 5.5.2017, p. 176, ELI: <http://data.europa.eu/eli/reg/2017/746/oj>).'